

## **Pled d'avertura da la sessiun da favrer 2025** **Presidenta dal Cussegl grond, Silvia Hofmann**

---

*(Valair vala il pled discurre)*

Stimadas deputadas e stimads deputads

Chara vicepresidenta dal Cussegl grond

Stimada commembra e stimads commembers da la Regenza

Stimadas interpretas e stimads interprets

Preziadas collavuraturas e preziads collavuraturus da las medias

Chars giasts

Cordial bainvegni a la sessiun da favrer 2025

Jau ma legrel da puspè dastgar beneventar represchentantas da las uniuns da dunnas dal Grischun sin la tribuna. Questa giada è quai l'Uniun da dunnas Falera. L'uniun s'engascha per ils interess da las dunnas, furma ina impurtanta rait en il vitg e procura per purschidas multifaras e per la coesiun sociala. Grazia fitg, che Vus avais acceptà nossa invitaziun e che Vus persequitais nossa lavur davent da la tribuna.

(eventualmain auters bainvegnis)

«Ils bels dis dad Aranjuez èn ussa a fin.»

Cun questa frasa cumenza il drama renumà «Don Carlos» da Friedrich Schiller. Da la idilla allegra en la champagna returna la curt roiala spagnola enavos en la citad da Madrid, en il center da la pussanza, en il somber Escorial.

«Don Carlos» n'è betg mo in drama davart tradiment e dolur d'amur. Quai è er in drama politic, nua ch'i va per la resistenza dal pievel dals Pajais Bass cunter il reschim spagnol. I va per libertad persunala ed er per la libertad mentala. «Sire, dai a nus libertad mentala!», pre-tenda il Marquis de Posa en in pled fitg passunà ch'el drizza al retg spagnol.

Il sistem agescha dentant senza schanetg. Il clom per libertad chaschuna unfrendas en il palaz roial a Madrid. Uschia er en ils Pajais Bass: En il rom d'ina expediziun penala da la Spagna vegnan 6000 persunas executadas. E la guerra d'indipendenza vegn a s'extender sur 80 onns.

«Ils bels dis dad Aranjuez èn ussa a fin.» Spontanamain è quai vegni endament a mai ils 21 da schaner, suenter che jau aveva udì il pled d'inauguraziun dal nov president american e passentà in di al WEF a Tavau.

Las allocuziuns da la presidenta da la Cumissiun da l'UE, da nossa ministra da finanzas, dal Chancelier federal da la Germania e dal president Selenski èn stads ina unica resposta als plets dal president american: preoccupaziun e spiert da cumbat, ma er malsegirezza, disch-illusiuin. Igl era evident: Dals Stadis Unids ans spetga insatge – bler vegn a sa midar – nus na savain anc betg tge.

Cura ch'il president Trump è vegnì connectà ils 23 da schaner per video al WEF, ha el repetì per gronda part sia analisa davart la situaziun da la naziun americana. Ses pajais giaja en decadenza, saja periclità d'ina immigraziun criminala ed illegala, d'ina burocrasia excessiva, d'autoritads giudizialas corruptas, da programs statals per la protecziun da l'ambient e per l'egualitad dals dretgs. E responsabla per questa situaziun saja la regenza da ses antecessur.

Ussa dastgain nus esser spanegiads, co e cura che la «epoca d'aur» empermissa vegn a cumenzar en ils Stadis Unids.

Vegn quai a capitar tras investiziuns enormas en la tecnica virtuala? La ferma cardientscha en systems binars, saja quai en connex cun la biologia umana u en connex cun programmar computers, illustrescha ina visiun dal mund ch'ins po divider cleramain en alv e nair, bun e nausch. La simplificaziun radicala è la metoda da noss temp.

Grazia a las medias socialas pon ins observar quai dapi in tschert temp er en la buna veglia Europa ed exact tuttina er en la paschavla Svizra.

Cun plets marcants vegnan ils privels per noss pajais evocads. I vegnan derasads uschenunads «fatgs» che pericliteschan apparentamain nossa pasch e nossa bainstanza. En ina spirala senza fin vegnan ils tuns adina pli penetrants, ils plets pli canerus e pli drastics.

Jau sun segira, che Vus savais tuttas e tuts, tge che jau manegel cun quai.

L'escalaziun dals plets, la lingua chargiada cun violenza, la deumanisaziun da l'adversari, il quest u quai – quai è ed era gia adina: l'emprim stgalim vers la fatalitad.

I na sa tracta pli da barattar arguments. Opiniuns divergentas na vegnan betg prendidas per enconuschientscha u discutadas – ellas vegnan utilisadas per far pretensiuns cuntrarias ed insultas personalas.

Arthur Schopenhauer, in impurtant filosof tudestg dal 19avel tschientaner, ha laschè enavos ina scrittira ch'è oz enconuschenta sut il titel «Die Kunst, recht zu behalten». En quella scrittira preschenta el 38 abilitads, co ch'ins ballantscha suror ina discussiun e po gudagnar ina debatta. I dat abilitads senza malart, ma er trics perfids.

La 38avla abilitad è l'ultima. Gugent As preschent jau quella:

(Citat)

«Sch'ins senta, che l'adversari è superiur e ch'ins na vegn betg ad avair raschun; alura daven-tian ins personal, insultant, grop.

Daventar personal manegia, ch'ins s'allontanescha da l'object da la disputa (perquai ch'ins ha pers il giu) e ch'ins attatga d'ina maniera u l'otra il litigant e sia persuna...

...ins vegn pia permalant, malizius, insultant, grop. Quai è in'appellaziun da las forzas dal spiert a quellas dal corp, u a l'animalitad.

Questa regla è fitg populara, perquai che mintgin è abel da l'exequir ed ella vegn uschia applitgada savens.»

(Fin dal citat)

Questa abilitad enconuschain nus dals tavulins, da charplinas sin las giassas e dal grond dumber d'emissiuns da discussiun en la televisiun. E Schopenhauer dat gist er in cussegl per la persuna attatgada, per uschè dir per la cuntrattatga. El avertescha dentant, che quai na saja betg simpel.

(Citat)

«Ins sa sbagliass fitg, sch'ins manegia ch'i bastia da sez betg daventar personal. Perquai che cun mussar tut calmamain ad in, ch'el n'haja betg raschun e giuditgeschia pia fallidamain e pensa fauss, grittantan ins el pli fitg che cun far ina remartga groppa, insultanta...

...in ferm sang afraid po però gidar (er qua), sch'ins respunda numnadamain cun calma, subit cura che l'adversari daventa personal, che quai na tutgia betg tar la chaussa e maina il discours immediatamain puspè enavos sin quella.... Quai n'è però betg dà a mintgin...»

(Fin dal citat)

Bainchapì: Schopenhauer discorra qua da debattas en temp real, a bucca e da fatscha a fatscha.

Cuntraversas capitan oz dentant savens sut tut autras cundiziuns: tranter auter en il spazi virtual, en l'anonimitad d'agens munds betg controllabels – correspondentamain èsi difficil da revegnir «a la chaussa».

Ed igl è natiralmain ina gronda absurditad da reclamar la libertad d'opiniun e d'expressiun legitimada democraticamain per il spazi virtual, senza surpigliar responsabladad.

Ma precis quai vegn fatg. En il spazi virtual èsi numnadamain pussaivel da plazzar incontestadamain sias groppadads ed offensiuns, perquai che nagin na sto revelar sia vaira identitad. Ils sforzs per sa drizzar a posts d'annunzia u schizunt a la polizia èn memia gronds, dovran temp e na portan memia savens nagin resultat.

Betg tut las persunas attatgadas reusseschan d'ignorar duraivlamain las attatgas. En Germania inditgescha stgars in quart da las politicras pertutgadas e mintga dieschavel politicher pertutgà da sa retrair perquai da la lavur politica.

En Svizra datti mo in sulet studi en chaussa. Quel è vegnì publitgà la fin dal 2024 dal Center per democrazia. Da las 1000 politicras e politichers communal dumandads han pli che in terz inditgà offensiuns verbalas, da quai 30 pertschient online, ed en 20 pertschient dals cas èn vegnids inditgads fake news ch'èn vegnidas derasadas sistematicamain. Spezialmain pertutgadas èn las dunnas stadas.

Sarah Akanji, ch'è vegnida elegida l'onn 2019 cun in resultat excellent en il parlament dal chantun Turgov, è suenter mo ina legislatura betg pli sa messa a disposiziun per la reelecziun. Remartgas e commentaris rassistics misogins avevan fatg memia grond donn ad ella sco persuna ed a sia lavur politica.

Er tar autras politicras e politichers enconuschents sin plaun naziunal èn vegnidas documentadas offensiuns, smanatschas ed attatgas sin nivel persunal.

Quai sutminescha a lunga vista la motivaziun da s'engaschar politicamain per la societad – e gist quai è in vaira privel per la democrazia e per la societad.

Nus na pudain dentant betg mo discurrer en plets da dumengias da participaziun, d'ina represchentaziun gista, da schanzas egualas per tuttas e tuts e da l'autra vart tolerar, ch'igl è pussaivel en il spazi virtual d'attatgar e da far a fin persunas engaschadas ord in zup.

Jau appellesch a Vus qua dadens ed a tuttas e tuts che ans taidlan dadora: Restain tar in tractament cun respect, cun amicabladad e cun curtaschia. Ans considerain sco buns exempels. Ans engaschain per la protecziun cunter disfamaziun, offensiun ed attatgas persunalas.

Faschain en mintga cas tut quai, per ch'ils «bels dis dad Aranjuez» na sajan betg tuttenina a fin. Nus na stuain betg copiar demonstrators da forza che vulan metter en dumonda il stadi democratic e l'agir dal stadi ed abolir las instituziuns. Restain «tar la chausa».

Jau As engraziel per Vossa atenziun.

Cun quai avrel jau la sessiun da favrer 2025.